

Ո Ր Ո Շ ՈՒ Մ թիվ 64
Վարչական տույժ նշանակելու մասին

«24» մարտի 2021թ.

ք. Երևան

ՀՀ պետական եկամուտների կոմիտեի իրավաբանական վարչության պետ Արման Մնացականյանս, քննելով Բաղշի Վահիդ Խոդավերդիի վերաբերյալ նյութերը.

Պ Ա Ր Զ Ե Ց Ի՝

2021 թվականի մարտի 05-ին ՀՀ ՊԵԿ Հարավային մաքսատուն-վարչության աշխատակիցները Մեղրիի մաքսային կետ-բաժնի տարածքում զննության են ենթարկել ԻԻՀ-ից ՀՀ ժամանած, ԻԻՀ քաղաքացի Բաղշի Վահիդ Խոդավերդիի կողմից շահագործվող «KAVIAN» մականիշի, 35AA889/35AA890 հաշվառման համարանիշի բեռնատար ավտոմեքենան, ինչի արդյունքում, նշված բեռնատարի խցիկի անկողնու տակից հայտնաբերել մաքսային հսկողությունից թաքցրած 3 կգ քաշով ջինսե տաբատ, 0,5 կգ քաշով տղամարդու շապիկ և 4 կգ քաշով զուգագուլպա:

Փաստի առթիվ Բաղշի Վահիդ Խոդավերդի նկատմամբ ՀՀ մաքսային օրենսգրքի 201-րդ հոդվածի հատկանիշներով կազմվել է մաքսային կանոնների խախտման վերաբերյալ արձանագրություն իսկ վերցված 3 կգ քաշով ջինսե տաբատը, 0,5 կգ քաշով տղամարդու շապիկը և 4 կգ քաշով զուգագուլպան՝ որպես իրավախախտման անմիջական օբյեկտ, վերցվել և ի պահ է հանձնվել Մեղրիի մաքսային պահեստում:

Վարչական վարույթի ընթացքում 12.03.2021թ-ին Բաղշի Վահիդ Խոդավերդին բացատրություն է տվել այն մասին, որ Իրանում իր ծանոթներից մեկը իրեն է փոխանցել 3 կգ քաշով ջինսե տաբատ, 0,5 կգ քաշով տղամարդու շապիկ և 4 կգ քաշով զուգագուլպա, որպեսզի ինքը տեղափոխի ՀՀ և հանձնի հասցեատերերին: Բաղշի Վահիդ Խոդավերդին հայտնել է, քանի որ գումար չի ունեցել հայտարարագրման համար նախապես վերոնշյալ ապրանքը թաքցրել է բեռնատարի խցիկի անկողնու տակ և շարժվել ՀՀ: ՀՀ-ում Մաքսային հսկողության ընթացքում հայտնաբերվել է վերոնշյալ բեռը: Բաղշի Վահիդ Խոդավերդին իր տված բացատրությամբ հայտնել է, որ ընդունում է իր կողմից կատարված իրավախախտման փաստը:

Վարչական վարույթի ընթացքում 12.03.2021թ գրությամբ հարցում է կատարվել ՀՀ ՊԵԿ Հարավային մաքսատուն-վարչություն ճշտելու 3 կգ քաշով ջինսե տաբատի, 0,5 կգ քաշով տղամարդու շապիկի և 4 կգ քաշով զուգագուլպայի մաքսային արժեքը և վճարման ենթակա մաքսային վճարների չափը:

ՀՀ ՊԵԿ Հարավային մաքսատուն-վարչություն 15.03.2021թ. գրության համաձայն՝ 2021 թվականի մարտի 5-ի դրությամբ <<բացթողում ներքին սպառման համար>> մաքսային ընթացակարգով վերոնշյալ քանակներով ջինսե տաբատի, տղամարդու շապիկի և զուգագուլպայի հայտարարագրելու դեպքում մաքսային արժեքը կկազմի 97,578 ՀՀ դրամ, մաքսային վճարներ 30,671 ՀՀ դրամ:

ԵԱՏՄ մաքսային օրենսգրքի 2-րդ հոդվածի 1-ին մասի 25-րդ կետի համաձայն՝ «Միության մաքսային սահմանով ապրանքների անօրինական տեղափոխում է համարվում ապրանքների տեղափոխումը Միության մաքսային սահմանով այն վայրերից դուրս, որոնցով, սույն Օրենսգրքի 10-րդ հոդվածին համապատասխան, պետք է կամ կարող է իրականացվել ապրանքների տեղափոխում Միության մաքսային սահմանով, կամ այդ վայրերում գտնվող մաքսային մարմինների աշխատանքային ժամանակից դուրս, կամ մաքսային հսկողությունից թաքցնելու կամ ապրանքների ոչ հավաստի հայտարարագրման կամ չհայտարարագրման կամ ապրանքների վերաբերյալ ոչ հավաստի տեղեկություններ պարունակող փաստաթղթեր օգտագործելու միջոցով եւ (կամ) նույնականացման կեղծ կամ այլ ապրանքներին վերաբերող միջոցներ օգտագործելու միջոցով:

ՀՀ Մաքսային օրենսգրքի 189-րդ հոդվածի համաձայն՝ մաքսային կանոնների խախտում է համարվում անձի կողմից կատարված անօրինական գործողությունը կամ անգործությունը, որն ուղղված է Հայաստանի Հանրապետության մաքսային օրենսդրությամբ և մաքսային ոլորտին առնչվող Հայաստանի Հանրապետության միջազգային պայմանագրերով Հայաստանի Հանրապետության մաքսային սահմանով տեղափոխվող ապրանքների և տրանսպորտային միջոցների մաքսային հսկողության և մաքսային ձևակերպման սահմանված կարգի դեմ, և որի համար սույն օրենսգրքով նախատեսված է պատասխանատվություն: Ֆիզիկական և պաշտոնատար անձինք մաքսային կանոնները դիտավորյալ կամ անզգուշորեն խախտելու համար ենթակա են պատասխանատվության:

ՀՀ մաքսային օրենսգրքի 201-րդ հոդվածի համաձայն՝ Հայաստանի Հանրապետության մաքսային սահմանով ապրանքների տեղափոխումը՝ մաքսային հսկողությունից թաքցնելով, այսինքն՝ գաղտնարանների օգտագործմամբ, ապրանքների հայտնաբերումը դժվարացնող այլ եղանակներով կամ ապրանքներին այլ տեսք տալու միջոցով՝ հանցագործության հատկանիշների բացակայության դեպքում՝ առաջացնում է տուգանքի նշանակում՝ այդ ապրանքների մաքսային արժեքի չափով:

ՀՀ մաքսային օրենսգրքի 219-րդ հոդվածի համաձայն՝ մաքսային կանոնների խախտման վերաբերյալ գործը քննվում է վարչական պատասխանատվության ենթարկվող անձի մասնակցությամբ, չներկայանալու դեպքում կարող է քննվել նաև տվյալ անձի բացակայության դեպքում, եթե քննության տեղի ու ժամանակի մասին սահմանված կարգով նրան տեղյակ է պահվել, սակայն վերջինիս կողմից որևէ միջնորդություն չի հարուցվել, կամ եթե անձը բացակայում է, և հայտնի չէ նրա գտնվելու վայրը, կամ եթե նա գտնվում է Հայաստանի Հանրապետության սահմաններից դուրս:

Բաղշի Վահիդ Խոդավերդին 2021 թվականի մարտի 24-ին հրավիրվել է ՀՀ ՊԵԿ իրավաբանական վարչություն՝ իր նկատմամբ ՀՀ մաքսային օրենսգրքի 201-րդ հոդվածի հատկանիշներով սկսված վարչական գործի քննությանը մասնակցելու համար և միաժամանակ նախազգուշացվել, որ համաձայն ՀՀ մաքսային օրենսգրքի 219-րդ հոդվածի՝ չներկայանալու դեպքում վարչական գործի քննությունը կիրականացվի առանց իր մասնակցության, սակայն վերջինս չի ներկայացել:

Այսպիսով, նյութերով պարզվել է, որ 2021 թվականի մարտի 5-ին Բաղշի Վահիդ Խողավերդին մաքսային հսկողությունից թաքցնելով՝ մասնավորապես հայտնաբերումը դժվարացնող եղանակով, բեռնատարի խցիկի անկողնու տակից թաքցրած ՀՀ մաքսային սահմանով տեղափոխել է 97,578 ՀՀ դրամ արժեքով 3 կգ ջինսե տաբատ, 0.5 կգ տղամարդու շապիկ և 4 կգ զուգագուլպա, այսինքն՝ Բաղշի Վահիդ Խողավերդին թույլ է տվել ՀՀ մաքսային օրենսգրքի 201-րդ հոդվածով նախատեսված մաքսային կանոնների խախտում, ինչը հիմնավորվում է մաքսային կանոնների խախտման վերաբերյալ կազմված արձանագրությամբ, 05"03"2021թ-ի մաքսային գննման (տեսագննման) ակտով, ՀՀ ՊԵԿ Հարավային մաքսատուն-վարչություն 15.03.2021թ.ի գրությամբ:

Վերոգրյալի հիման վրա և ղեկավարվելով ՀՀ Մաքսային օրենսգրքի 201-րդ հոդվածով, 206 և 221, 224 հոդվածներով,


Ո Ր Ո Շ Ե Ց Ի

1. Բաղշի Վահիդ Խողավերդին (ծնված՝ 20.06.1988թ., ԻԻՀ, Թաբիզ, Քալեթդար , անձնագրի համարը H 42483763) ճանաչել զանցառու ՀՀ մաքսային օրենսգրքի 201-րդ հոդվածով և նրան տուգանել ՀՀ մաքսային սահմանով թաքցնելով տեղափոխված 3 կգ ջինսե տաբատի, 0.5 կգ տղամարդու շապիկի և 4 կգ զուգագուլպայի մաքսային արժեքի չափով՝ 97,578 ՀՀ դրամ: /վճարումը՝ 900005024055 հաշվեհամարին կող 19/:

2. Վերցված ապրանքները կարող են վերադարձվել տուգանքի վճարումից հետո՝ մեկ աշխատանքային օրվա ընթացքում:

3. Որոշման մասին հայտնել Բ.Խողավերդին՝ պարզաբանելով, որ ՀՀ Մաքսային օրենսգրքի 221-րդ հոդվածի 2-րդ մասի համաձայն՝ որոշումն ուժի մեջ է մտնում կայացման պահից: ՀՀ Մաքսային օրենսգրքի 222-րդ հոդվածի համաձայն՝ որոշումը կարող է բողոքարկվել վերադաս մաքսային մարմին՝ դա կայացնելուց հետո 10 օրվա ընթացքում կամ ՀՀ Վարչական դատարան երկու ամսվա ընթացքում

ԻՐԱՎԱԲԱՆԱԿԱՆ
ՎԱՐՉՈՒԹՅԱՆ ՊԵՏ



ԱՐՄԱՆ ՄՆԱՑԱԿԱՆՅԱՆ